

Professional Security Foundation ta un realidad pa eleva siguridad na Aruba

DIALUNA, Minister di Husticia y Asuntonan Social sr. Rocco Tjon, a reuni cu “Professional Security Foundation”, cual a wordo estableci siman pasa y ta wordo presidi pa sr. Aaron Antersijn. Ta asina cu algun luna atras a reuni cu e sector priva y Cuerpo Policial, p’asina wak con por colabora mas cu e sector priva p’asina eleva siguridad, pues “safety and securtiy” na pais Aruba. Esaki ta algo sumamente importante, pasobra mas y mas ora ta wak e desarojo pa loke ta trata criminalidad, nos ta bira mas consciente cu nos mester cera e tipo di coalicionnan aki entre sector publico y sector priva pa nos por garantisa mas siguridad. Cu e iniciativa aki, esaki por wordo logra, door di yega na convenionan cu sector priva pa di e forma ey traha mas di cerca cu Husticia.

Manera ta conoci, ya caba tin un proyecto existente, caminda e “bike patrol” den e area hotelero ta traha hunto cu Cuerpo Policial di e forma ey garantizando mas siguridad. E fundacion nobo aki, tin representacion di Cuerpo Policial, sin mas remarcabel ta cu Veiligheidsdienst Aruba (VDA) tambe ta forma parti di e fundacion aki hunto cu sector priva, pues hunto nos por mehora e siguridad cu ta wordo brinda.

E meta di e fundacion aki ta pa sigui profesionalisa e trabou di siguridad na Aruba, reconoce e profesion di un security officer door di inverti den e parti di educacion, pa di e forma ey por colabora mucho mas miho. Interesante ta, cu nos kier yega na un sistema, caminda ta bay bin cu un certificacion cu ta bay wordo reconoci door di Ministerio di Husticia y Asuntonan Social a traves di Cuerpo Policial y VDA, pa di e forma ey garantisa un coopera-



cion mucho mas miho. Diferente ehecucionan ta andando pa wak con por mehora esaki.

Manera Alto Comisario semper a bin ta bisa, mester forma coalicionnan di siguridad pa por eleva siguridad y esaki ta un iniciativa concreto. E enfoke lo ta riba e parti di educacion, pero tambe riba e parti di yega na un seya, e parti di siguridad fisico, electronico, cibernetic como tambe research and development pa di e forma ey por brinda consehonan na ministerio y organisonnan cu ta traha den e tereno di siguridad.

E lunanan nos dilanti, e fundacion aki lo

bay tin diferente sesionnan informativo cu tur stakeholders, companianan di siguridad, pero tambe cu departamentonan gubernamental y otro partners den otro sector, p’asina nos por bay wak con ta bay brinda mas contenido n’e trabounan cu nan ta bay ehecuta e añanan nos dilanti.

Por ultimo, minister Tjon a expresa di ta satisfecho di por a wak representacion di ful mando di Cuerpo Policial, Veiligheidsdienst, sector priva, sector bankero como tambe sector hotelero durante e reunion y di e forma aki lo bay traha e añanan nos dilanti, p’asina wak con hunto ta bay sigui eleva siguridad na Aruba.